

## IL PAPE NOL VEN

Ancje se no vin tante jentradure tai anbients vaticans, o vin però ancje nô i nestrîs cjanai di informazion.

Poben, o vin savût di int avonde in dentri ventijù che il pape nol vignarà gran in Friûl pal decim dal taramot e par screâ il domo di Glemone. Sichè tocjarà propriit viodilu cul canocjâl...

I motîfs che àn fat pendi la balance pal no a son di ordin che lôr lu clamin di «opportunità».

Cence spiegâsi miei, e àn lassât capî la lôr delusion tremende no tant pes polemichis de part contrarie, che chês a son pardut e po il pape no si lasse di sigur inpressionâ di chês nainis lì, ma la lamiece, la pocje voe, la flapêrie de part catolice.

Cul gjespâr inviât dal nestri gjornalut, la regjon no semee plui disponude a butâ fûr un clincar, soledut dopo des interpelancis dai socialiscj e dai partîts di cjanpe. E chest al è un berdei no di pôc, parceche, ancje se no vessin di sei tre taronz, si è sinpri sul ordin dai miliarts. Pai millions che le riguardin, la curie di Udin e jè rissolude a no domandâj une palanche `e int, che cumò no j ai dares nancje pai siet sentiments. Si rassegnaran a sgarfâ par ducj i casselins, di ogni gjenar e misure, fin ch'an cjatin.

Ce che ur à dât fastidi lajù e jè stade la clime de gjerarchie e dai argagns «uficiâi» de glesie regjonâl. Si spietavin, come minim, che i cuatri vescuri, tal pontificâl di Nadâl o tal Tedeum dal ultin dal an a visassin uficialmentri dal viaç di Zuan Pauli II. A mancjn cuatri mêsi! E invessit a son vignûts fûr cun chês letare cuintri dai armamenz che e à ingjaulât ducj i partits.

Al semeave che le ves componude Panella «No ch'a setin robis fûr di plonp - nus à precisât l'informadôr roman -, ma nol è chel il mût di frontâ la cuistion. Ancje la Sante Sede e jè cuintri de vuere e a pro de pâs, ma no si insumiares par mai di fâ une vuere pe vuere e di pierdi la pâs e la buine armonie cu lis fuarcis politicis pe pâs».

Pe part plui specifiche udinêse, ur à brusât la letare che une trentine di predis j àn consegnade al vescul Battisti, là ch'a metin jù, neri su blanc, dutis lis lôr «perplessitâts». E soledut si son sustâts pe rispueste dal vescul, ch'al à cunvignût ancje lui che il pape al vares di vignî cun mancjâl ponpe e che lui si è cjatât inpastielât a vore fate, dopo che il

paîs di Glemone j ere passât sore marcjât. Tant a dî che nô no jentrin in nuje; ch'a si rangjn i glemonas. Cence dî, po, che chêi cuatri che lu volaressin, a tirin fûr, come reson primarole, che il pape «ancje s'al coste salât, al bute, parceche al fâs reclam e al clame dongje int e al fâs girâ bêz». In Vatican j tegnin che no si fasi passâ il Pontefic come un gjostrâr o un ch'al fâs balâ l'ors in place.

L'uniche sodisfazion e jè stade une letare di un troput di fruts e di gjenitôrs dal Bearzi e finît lì. Ma un pape nol po' frontâ un viaç di chê sorte pal Bearzi. Se mai ur conven menâju ju lôr a Rome cu la coriere.

Cun dut a chest, Zuan Pauli II al è instes ben disponût cui furlans e al spere, in curt, di podê dâur il permes di dî Messe te lôr lenghe. Dome che, prin, al à di jessi dacordo Craxi. Nol pò plantâ une barufe cun Craxi, che lu à dongje, pai furlans, ch'a son lontans e neutros. «Parâtri, il pape al ringrassie e nol dismentee. Tignît preât» al à concludût il prelât, metint jù la cuarnete cun tun intono sibilin.

Articul gjavât de La Patrie dal Friûl di Zenâr dal 1986, n. 1